

Murid 11 tahun cipta makanan haiwan, menang anugerah antarabangsa

NORAWAZNI YUSOF | | 18 September 2021



Maryam merangkul tiga emas dalam pertandingan inovasi dan reka cipta di Toronto, Kanada.

KUANTAN - Seorang murid dari Sekolah Kebangsaan (P) Methodist Kuantan mendapat pengiktirafan antarabangsa apabila merangkul tiga pingat emas dalam pertandingan inovasi dan reka cipta yang berlangsung di Toronto, Kanada, bulan lalu.

Maryam Muzamir, 11, mencipta inovasi sejenis makanan haiwan baharu yang diperbuat daripada kulit udang dan siput sedut dengan menamakan produk itu Yam 2.0 dalam pertandingan sempena The 6th International Invention, Innovation Competition (iCAN) 2021.

iCAN 2021 adalah pertandingan inovasi dan rekacipta terbesar di benua Amerika Utara yang diadakan secara dalam talian pada 28 Ogos lalu berikutan faktor pandemik Covid-19.

Bapanya, Profesor Madya Ts Dr Muzamir Hassan tidak menyangka Maryam menjadi pemenang dalam pertandingan itu.

Menurutnya, kegigihan Maryam selama ini menghasilkan inovasi dan rekacipta berbaloi apabila mendapat pengiktirafan bukan sahaja dalam negara tetapi di peringkat antarabangsa.

"Maryam memenangi pelbagai anugerah pada tahun ini dan tahun lalu untuk produk Yam 2.0. Jadi, melalui pencapaian itu saya meyakinkan Maryam untuk membawa produk inovatifnya ke pentas antarabangsa.

"Usahanya berhasil apabila berjaya memenangi tiga pingat emas di ICAN 2021 dan Maryam mengalahkan 600 peserta lain dari 70 negara," katanya ketika dihubungi Sinar Harian pada Jumaat.



Maryam menunjukkan makanan haiwan hasil inovasinya daripada kulit udang dan siput sedut yang dinamakan Yam 2.0.

Bercerita lanjut mengenai anak sulung daripada dua beradik itu, Muzamir berkata, idea itu timbul ketika mereka sekeluarga mengunjungi sebuah restoran makanan laut di Kuantan.